

**Pakatan Pembangkang Alu-alukan Perjanjian Damai K'jaan Filipina-milf
Bernama
16 Oktober, 2012**

KUALA LUMPUR, 16 Okt (Bernama) -- Pakatan Pembangkang mengalu-alukan perjanjian damai antara kerajaan Filipina dan Barisan Pembebasan Islam Moro (MILF) bagi menamatkan konflik selatan Filipina yang telah berlarutan lebih 40 tahun.

Presiden PAS Datuk Seri Abdul Hadi Awang berkata ia merupakan satu penyelesaian baik dan positif kepada keamanan serantau dan antarabangsa seluruhnya.

"Kita harap semua perjanjian (yang dimeterai) itu dilaksanakan dengan sebaik-baiknya," katanya pada sidang akhbar selepas mesyuarat majlis pimpinan Pakatan Rakyat di Bangunan Parlimen, di sini, hari ini.

Malaysia menjadi pengantara rundingan damai antara dua pihak itu sejak 2001 sehingga perjanjian awal untuk perdamaian dicapai di Kuala Lumpur dalam rundingan dari 2 hingga 7 Okt lepas.

Dalam pada itu, Abdul Hadi berkata Pakatan Rakyat turut berharap penyelesaian aman dan adil juga dapat dilaksanakan di Myanmar untuk menyelesaikan masalah penindasan etnik minoriti Rohingya di sana.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=702397>